

**Regional News Unit AIR Aizawl
Wednesday, June 26, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **“Healthy Lunglei District Campaign” hnuaiiah 2nd Bn MAP te hriselna nimin khan endik a ni.**
- **State Level Buyers-Sellers Meet for Medicinal and Aromatic Plants chu nimin khan Aijal Club ah neih a ni.**
- **Vawiinah Lok Sabha Speaker thlan a ni dawn.**
- **Congress MP Rahul Gandhi chu Lok Sabha opposition Leader atan ruat a ni.**

<><><>

HEALTHY LUNGLEI DIST CAMPAIGN

“Healthy Lunglei District Campaign” hnuaiiah 2nd Bn MAP personnel te tan Lungleia 2nd Bn MAP complex, Luangmualah Non Communicable Diseases (NCD) Awareness leh Screening campaign nimin khan neih a ni a.

Natna inkaichhawn theih loh chi hrang hrang-Thisen sang, Stroke, Zunthlum leh Cancer chungchangah Dr. VL Hrechianga, MO, UPHC, Hrangchalkawn in zirtirna a pe a. 2nd Bn MAP mi 100 chuang te tan a thlawn in NCD screening nei zui a ni.

He awareness programme hi Pu C. Vanlalvena, 2nd IC 2nd Bn Battalion MAP in a kaihruai a, Pu Francis Lalnuntluanga, Commandant, 2nd Bn MAP leh Pu James Miahlung, Addl DC (Chairman, Sub Committee on NCD screening & awareness campaign) te pawhin thu an sawi a ni.

<><><>

MAHCO ASSEMBLY

Mizoram Apex Handloom & Handicraft Cooperative Society Ltd. (MAHCO) te chuan ‘General Assembly vawi 45-na nimin khan Aizawlah an hmang a. Cooperation Minister Pu PC Vanlalruatan a telpui a

Minister chuan thusawiin, Handloom chu Mizoram chung a Industry zing a pawimawh tak leh thawh hlawk ber pawl a nih thu sawiin hmasawna chak zawk a kalpui a nih theih nan Handloom leh a kaihhnawih Society tam thei ang ber chu MAHCO hnuaiia ziah luh zel a pawimawh thu a sawi. Mahni ram siam chhuah ngaihsan leh ngaihhlut a pawimawh thu Cooperation Minister chuan sawiin Sawrkar pisa hrang hrangah pawh mizo kutchhuak bungrua leh hnam ziarang phochhuak thei, Mizo handloom hmang uar zel tur a hmalak a nih thu a sawi a.

Pu PC Vanlalruata chuan Mizoram handloom leh handicraft-in hma a sawn zel theih nan mahni kut chhuakte chu khawvel hmun hrang hranga thawncchhuah tlak khawp a tha siamchhuah a tul thu sawiin hemi tur hian pawl anga inkaihhruaina tha tak neih a pawimawh thu a sawi a.

Sawrkarin ‘Hand Holding Policy’ kalpui a tum angin MAHCO member-te chu midangte khaichhuak leh kaihruaitu nih tum theuh turin kalkhawmte a chah bawk a ni.

Pu R.Lalremsanga, Registrar of Cooperative Societies chuan Handloom leh Handicraft chu eizawna rintlak a nih mai piahlamah hnam dangte laka kan hnam ziarang phochhuahna hmanraw tangkai taka hman a nih theih thu a sawi.

45th Annual General Assembly-ah hian Mizo kut chhuak Handloom leh Handicraft hrang hrang pho chhuahna tur hmunhma ruahman belh dan tur te, Hualngohmun a Mizoram Handloom & Handicraft Complex din a nih theih nana hmalak dan tur te, Handloom & Handicraft-in hma a sawn zel theih nan Ministry of Tribal Affairs hnuai ah State Tribal Development Cooperative Project thehluh a nih thu te ngaihthlak a ni a. Kum kalta chung a State Handloom Expo buatsaih a nih dan te ngaihthlak a ni bawk.

<><><>

UD&PA MINISTER

Urban Development & Poverty Alleviation Minister Pu K Sapdanga chuan nimin khan Aizawl Smart City Ltd. hnuai din, IT hmanga Aizawl khawpui hmun hrang hrang viltu nia ngaih theih – Integrated Command & Control Centre, Old Secretariat, Raj Bhawan bula awm chu a tlawh a, Aizawl Smart City Ltd. hotute leh helai hmun thawkte’n ICCC chanchin leh hnathawh tlangpuite leh IT thiamna leh camera hrang hrang hmanga Aizawl khawpui an vil dan chanchin te an hrilh.

Home Minister Pu K Sapdanga chuan Aizawl khawpui mipuite him nan leh tunlai thiamna hmanga engtik lai pawha lirthei leh Aizawl khawpui hmun hrang hrang vil theihna ICCC hi a tangkai hle nia a hriat thu sawiin tunhnaia misual hnuchhuina kawngahte leh lirthei intihpalhna leh lirthei in mihring a sut a tlansan te chu ICCC a camera atangin hriatchhuah a ni a, hei hi a tangkaina peng pakhat chauh a ni a. Chhiatrupna a thlen palh thu hlaah leh khuarel chhiatna a thlen a Aizawl khawpui chhunga information inpek zung zung theihna atana ICCC hi kan hman tangkai leh zual a tul thu te a sawi a ni.

Integrated Command & Control Centre bun nan leh kum 5 chhunga a enkawl nan cheng vaibelchhe 101 vel ruahman a ni a, a bun hna hi Bharat Heavy Electricals Limited (BHEL) pek niin anni hian Agreus Infotech Limited an thawh tir leh a. Nikum April ni 1 khan Home Minister Amit Shah an a hawn hnuin kum 2023, July thla atangin a hman theih ta a ni.

<><><>

BUYER/SELLERS MEET:AYUSH

Ramhmul Damdawi leh hnim hnah atanga damdawi siamchhuah hmanga sumdawng tura hmalakna, ‘State Level Buyers-Sellers Meet for Medicinal and Aromatic Plants chu nimin khan Aijal Club ah neih a ni a.

He buyers-sellers meet hi sorkar laipuaia Ministry of AYUSH hnuai National Medicinal Plants Board (NMPB) bultuma State Medicinal Plants Board (SMPB), Mizoram, Directorate of AYUSH in a buatsaih a ni.

He hun hmanpuitu Health & Family Welfare Minister Pi Lalrinpuii chuan thu sawiin, ramhmul damdawi chu hnam rohlu pakhat leh tangkai em em a ni a, a tangkaina te haichhuak belh zelin, kuthnathawktute tan leh economy chawikangtu pawimawh a nih theih a beisei a ti a.

He Buyer-Sellers meet hian Mizorama ramhmul damdawi chingtute leh la ching ve duhte tan market tha tak a hawn phah a, hlawkna tha tak chharchhuah a nih ngei a beisei thu a sawi a ni.

Minister chuan kuthnathawktute chawikan chu sawrkarin a ngaihpaawimawh thu sawiin, Handholding Policy chuan medicinal plants farmer te pawh a la huam tel thuai a beisei thu a sawi.

Buyer-Seller-meet hawnna inkhawmah hian National Medicinal Plants Board, Ministry of AYUSH leh CSIR-North East Institute of Science & Technology, Jorhat, Assam aiawh lo kal te'n thu an sawi bawk a. Mizoram AYUSH chu India state zinga Integrated Component Project kalpui hmasa ber a nih thu te an sawi a. Mizoram leilung chu medicinal plants leh aromatic plants chinna atan a that thu leh, tam tham tak a tharchhuak thei tan chuan hralhna lamah lungkham tur a awmluh thu te an sawi a ni.



UD&PA MINISTER

Mizoram State Ayush Society (MSAS) Governing Body chu nimin khan Secretariat Conference Hall-2 ah an Chairman Health & Family Welfare Minister Pi Lalrinpuii hovin an thukhawm a.

He meeting ah hian meeting hmasa a thu lo rel tawh te leh a bawhzui dan thlirletna neih a ni a. Agenda hrang hrang chhawpchuah te chu Chairman kaihhrainain thurel chhunzawm a ni. He meeting-ah hian Mizoram hmun hrang hranga AYUSH Doctor awmte mamawh leh hmasawn zelna tur te sawi a rel ho a ni.

Tun dinhmunah hian AYUSH Doctor te hi Mizoram Sorkar hnuaiah a ngheta thawk (Regular) hi Doctor 16 an awm mek a, Contractual a thawk hi National AYUSH Mission hnuaiah Doctor 46 thawk mek an awm a, NHM leh Health Programme hrang hrang hnuaiah AYUSH Doctor mi 84 vel thawk mek an awm bawk a ni.



MIZORAM VC BILL 2024

LAD Minister Pu C. Lalsawivunga, hovin The Mizoram (Village Councils) Bill 2024 chungchang ngaihtuahn nimin khan MINECO ah thutkhawm a ni a.

VC te chu The Lushai Hills District (Village Councils) Act 1953 hnuaia inenkawl an la ni a, he dan hi a hlui tawh avang leh khawtlangin a mamawh tawh lem loh a tam bakah thil thar belh tur leh tihdanglam tur a awm tawh avanga he VC Draft Bill 2024 hi lo irhchhuak a nih thu tarlan a ni a. VC member a hmeichhe reservation leh VC term rei zawng chungchang sawiho a ni bawk.

He draft bill, The Mizoram (Village Councils) Bill 2024 chungchang inrawnkhawmna-ah hian VC member-te tam zawng hi chenna in awm zat ni lovin mihring cheng zat atanga the ni tawh se tih a ni a. VC Secretary atan hian Sorkar hnathawk angin special recruitment awm thei se tih a ni bawk.

Meeting-ah hian VC thiah hun, thiah dan leh an hnathawh tur bakah an thuneih dan tur te sawiho nghal a ni bawh.

Meeting-ah hian Pu Lalmuanpuia Punte, MLA, Advisor to CM (Political) pawhin VC Draft Bill 2024 a belh tur leh paih tur ngaihdan a sawi bawh a ni.

He dan hi Assembly-in a pass chuan Municipality te bakah Autonomous District Council huam lovin Mizoram pumah hman tur a ni ang a. He thutkhawmah hian member te'n ngaihdan leh duhdan an neih te sawi vek sen a nih loh avangin LAD Secretary hnenah an ngaihdante ziaka thlen a, Drafting Committee-in a khaikhawm a tan tih a ni a. Chumi atanga thla khat hnuah thutkhawm leh nise tih a ni bawh.

Meetingah hian Political Party aiawh hrang hrang BJP, Congress, MNF, bakah MUP, Central YMA, All Mizoram VC Association, khawtlang inrelbawlina lama mithiam Pensioners aiawhte, Drafting Committee Member, LAD Secretary bakah LAD Dept. Official te an tel a ni.

<><><>

LOK SABHA OATH TAKING

Lok Sabha 18-naa MP thlan tharte rinawmna thutiam tira member atana lakluh chu nimin khan zawh fel a ni.

Nimina lakluh zingah Mizoram atanga Lok Sabha MP atana thlantlin Pu Richard Vanlalmangaiha pawh a tel a.

MP atana lakluh zingah hian Uttar Pradesh-a Rae Bareilly bial atanga thlan tlin Congress hruaitu Rahul Gandhi pawh a tel a. Ani bakah hian MP langsar tak tak Om Birla, Akhilesh Yadav, Abhishek Banerjee, Supriya Sule, Hema Malini, Yusuf Pathan, Mahua Moitra, leh Kanimozhi te pawh MP lakluh zingah hian an tel a ni.

MP lakluhte hian Hindi leh English bakah hian Telugu, Assamese, Bangla, Malayalam, Gujarati, Sanskrit, Kannada, Odia, Dogri leh adangte hmangin rinawmna thutiam hi an la a ni.

<><><>

LOK SABHA SPEAKER

Vawiinah Lok Sabha Speaker thlan a ni dawn. BJP MP hlun leh Lok Sabha term hmasaa Speaker ni bawh Om Birla chu NDA ten Speaker atan an rawt a. Hetihlai hian lehlamah INIDA bloc te chuan Congress MP K Suresh chu Speaker atan an nominate ve thung a ni. Candidate pahnihte hian nimin khan an nomination hi an thehltut nghal a ni.

Thudawn danin sawrkar leh opposition lamte hi Speaker chungchangah hun rei tak an inbiak hnuin an inrem thei lo a. Opposition lamin Deputy Speaker post an ngiat chu sawrkar lamin an remtih loh avangin Speaker atana an chhawpchuah Om Birla pawh Opposition lamin an pawmpui thei ta bik lo a. Hei vang hian Speaker thlan a ngai dawn ta a. Tun tum hi Lok Sabha-ah Speaker post inchuha inthlan a awm hmasak ber a ni dawn a ni.

<><><>

LOP RAHUL GANDHI

Congress MP Rahul Gandhi chu Lok Sabha opposition Leader atan ruat a ni. Congress Party General Secretary KC Venugopal chuan nimin tlai khan hemi chungchang hi New Delhi ah Chanchinbumite a hrilh a.

Congress Parliamentary Party Chairperson Sonia Gandhi chuan Protem Speaker Bhartruhari Mehtap hnenah Leader of Opposition atan Rahul Gandhi ruat anih thu hi ziakin a thehlut a ti.

Nimin vek khan INDIA bloc party tin floor leader te Congress President Mallikarjun Kharge inah an thukhawm bawk a ni.

